



CONSIDERACIONES ESTRATÉGICAS DE PURNA T'A «TROBADA D'O NACIONALISMO ARAGONÉS DE CUCHAS»

A o congreso d'o nacionalismo aragonés reuniu os diyas cuatro y cinco de febrero d'o 2012 en Morillo de Galligo y convocau por o Coleutibo Nazionalista Aragonés de Cuchas, nos fería goi dende l'organización Purna A Chovenalla Revolucionaria y Independentista, comunicar, d'aluerdo a las pretensions expresadas por os organizadors, o siguient:

- Que sentimos no participar fisicament d'ista trobada en a que, encara quan no hemos estau formalment convidaus como organización d'a choventut independentista aragonesa, deseamos colaborar aportando a nuestra visión tactica y estratechica t'o que s'ha denominau como «nacionalismo de cuchas».
- Que entendemos que as pretensions de tot «nacionalista de cuchas» no pueden estar soque aconseguir l'autodeterminación y a soberanía t'Aragón como ente nacional con identidat propia y definida, y t'o pueblo aragonés como expresión social vivida d'a emancipación de clase. Agora bien, a soberanía y l'autodeterminación no dixan d'estar nada más que conceptos churidicos abstractos que creyemos que en dengún caso pueden definir l'acción d'un movimiento politico.
- Que consideramos que en dengún caso podemos reducir a nuestra luita a un anhelo churisdiccional como lo que representa o dreito por l'autodeterminación u fer-se efectivo d'a soberanía; que lo que o pueblo aragonés deseya estar no ye, en l'actualidad, consecuencia d'a suya propia autoconsciencia como nacionalidat soque vien marcau por una alienación, isto ye, por a influencia que o discurso espanyolista tien arredol d'a nuestra consciencia subchetiva como pueblo; y que, en consecuencia, a necesidat politica no se circunscribe a o dreito de soberanía soque troba o suyo mayor reto en lograr a consciencia de sí mesmo d'o pueblo aragonés, en desplazar a potencia simbolica d'o nacionalismo espanyol y en aconseguir que Aragón pueda autoafirmarse como pueblo nacional sin incherencia externa.
- En consecuencia con l'anterior entendemos que a millor tactica posible, l'unica opción viable, t'aconseguir o pleno autodesembolique en consciencia y materialidat d'o pueblo aragonés, ye apostar por a independencia. En dengún caso, por o contrario, creyemos que i haiga d'optar-se por una independencia



dentro d'o marco capitalista soque iste obchetivo ha d'estar siempre subsumiu baixo lo proyecto de construcción d'un sistema economico socialista que prime as relaciones de solidaridat internacionalista entre os diferents pueblos y en o que a clase obrera y a humanidat en o suyo conchunto puedan plegar a la suya plenitut.

- Que dica agora ha existiu un movimiento politico dedicau a la creyación d'ista subchetividat nacional d'o nuestro pueblo, «l'aragonesismo» de cuchas, que hue se presenta en ista trobada como «nacionalista». En cualesquier caso, l'aragonesismo (y tot lo «aragonesista») ye una traza, pensamos, desfasada, de autoconciencia nacional, l'estadio pueril u *lighth* d'un movimiento politico más avanzau que ha de surchir. Asinas, l'aragonesismo no ha dixau d'estar nada más que un rechionalismo encubierto, l'actitut cobarde de qui tien medrana de decir lo que reyalment deseya; a independendencia. En consecuencia refusamos toda formula pretendidament «aragonesista» como obsoleta y rechionalista que en iste momento historico no fa soque entorpecer a creyación d'a conciencia nacional aragonesa.
- D'a mesma traza entendemos que a denominación de «nacionalista» ye una expresión que no aporta cosa dende l'anvista politica a iste movimiento. L'independentismo reculle en o suyo seno y presupone todas as aspiracions identitarias d'o nacionalismo, librandolo de vez de contenu mitolochico y de irracionalidat. Con a formulación «de cuchas» ye similar, ye una traza masiau trillada que mica u nada puet aportar a os nuestros planteyamientos politicos. Un independentismo consecuent no ye, en o fundo, de cuchas soque supera con creixes ista adchetivación. Si lo que se deseya ye un sistema socialista y l'internacionalismo entre totz os pueblos podemos veyer clarament como l'adchetivo cuchas queda desbancau. Asinas, entendemos, a postura correcta ye a de «independentistas y socialistas» como expresión no d'una cuchas abstracta soque d'os d'abaixo, d'a clase obrera en pugna por rematar con a explotación humana.
- Entendemos, por a nuestra inclinación por a independendencia, que toda mena de federalismo ye en zaguer termino una traza de traición a o pueblo aragonés. Aceptar a federalidat con a resta de pueblos d'a peninsula iberica ye aceptar d'una u atra traza una ideya abstracta d'Espanya que no somos disposaus a tolerar. Espanya no ye más que un discurso historico d'a clase dominant ta chustificar o suyo imperialismo y a suya dominación estructural, por ello lo federalismo ye, en o fundo, una construcción cuyo sustrato zaguer ye o nacionalismo espanyol. Encara que una fase d'Espanya federalista pueda estar tomada como un trango estrategico deseyable en a consecución d'a independendencia, reivindicarla ye tirar piedras sobre o nuestro propio tellau. A nuestra aspiración ha d'estar siempre a independendencia y ta lograr-la podremos aceptar diferents estadios pero nunca no perder de vista l'obchetivo d'o nuestro discurso. Atra concepción amanada a o federalismo, entendemos, ye una traza más d'expresión de l'espanyolismo.
- En consecuencia con tot l'anterior queremos expresar que a millor estrategica politica t'iste «nacionalismo de cuchas» ha d'estar l'encuadramiento de totz os que se consideren dentro d'ista corrient en as organizaciones politicas

independentistas existents. Entendemos que o movimiento politico independentista ya ye fendo os tringos estrategicos adecuauos y que, por ello, lo menester agora ye que totz os que albergan dandalos i perteneixen a iste «nacionalismo descafeinau» sumen fuerzas en torno a o Bloque Independentista de Cuchas y as organizacions que lo componen. Seguir atro camín ye, en finitiva, tornar sobre formulas obsoletas que reproducen comportamientos politicos inacceptables.

- Siguiendo a naturaleza revolucionaria d'as organizacions independentistas que existen actualment, entendemos que tot lo «nacionalismo de cuchas» que se reúne en iste congreso ha de fer un virache enta la radicalidat politica y ideologica. Ya que o independentismo ye a superación tanto practica como teorica de tot aragonesismo u nacionalismo, ye menester que se recupere l'aspiración ubiertament revolucionaria abandonando tot intrés reformista. O «izquierdismo» ye, en finitiva, una estrategia reformista con a que no somos disposaus a colaborar por lo que a nuestra propuesta ye que os obchetivos revolucionarios primen arredol de cualsquier atra traza d'interpretación moderada d'o socialismo. Asinas, a socialdemocracia no puet constituyir ni una opción a considerar, ye una cosa a superar y a estricallar.
- En consonancia con as nuestras propias linias ideologicas entendemos que a estrategia politica d'iste «nacionalismo de cuchas» debe incluir: as luitas por a igualdat d'a muller, por a suya emancipación y a crebatura definitiva d'o patriarcau; tamién as luitas por a liberación sexual, no nomás dende l'anvista churidica soque dende a transformación radical d'as concepcions sociales y culturals. En finitiva, incluir a propuesta d'o feminismo politico como actividad estrategica clau t'a desaparixón d'a dominación de l'orden social existente. D'a mesma traza ye imprescindible reivindicar l'ecolochismo como actividad practica menester t'a conservación d'o meyo tant aragonés como global. Metendo especial enfasis en as luitas que se levan a cabo en o nuestro territorio y que afectan de traza especialment sensible a o nuestro pueblo, como son, por eixemplo, a menaza transvasista u a construcción d'entibos.
- En materia lingüística apostamos por o trilingüismo. Creyemos que una actitud estrategica clau ye l'acceptación sin prechucios u compleixos d'o catalán fablau en Aragón, desmintiendo as despreciables mentiras d'o rechionalismo aragonés que no son soque a expresión sectorial d'o nacionalismo espanyol. A nuestra actividad debe ir enta la reintroducción de l'aragonés en a totalidat d'o nuestro territorio, no enta la desaparixón d'o castellano soque por a reexpansión de l'aragonés en toda la sociedad aragonesa.
- A mán d'a cuestión territorial consideramos menester reclamar como aragonesa la denominada «Francha Oriental» pero sin caer en a puerilidat d'o nacionalismo irracional. A virtud democratica ha de prevalecer ante tot y en consecuencia han d'estar os habitants os que decidan qué ye lo que son. Antimás, ye menester apostar por un Aragón comunal, no dividiu en as actuals redoladas, soque en territorialidatz historicas y economicas como traza de desembolique d'o nuestro pueblo.

- Por atro costau consideramos menester o refirme explicito d'iste «nacionalismo de cuchas» a o independentismo vasco, en concreto a la Izquierda Abertzale y a suya luita por a independencia por resultar en l'actualitat a referencia politica, ideolochica y estratechica más avanzada d'o conchunto de l'Estau espanyol, y por trobar-se en un proceso politico historico t'o desembolique y a independencia d'ixe pueblo. Refirmar hue o proceso politico enta la independencia y o socialismo que ye levando a cabo a Izquierda Abertzale ye ubrir camín enta una verdadera transformación y cambio sociopolitico no nomás d'o pueblo vasco soque d'o conchunto de pueblos oprimiús de a resta de l'Estau, entre os que se troba o pueblo aragonés. Iste ha d'estar un refirme sereno y sin compleixos, que no reble baixo a subchetividad espanyolista imperant en o nuestro país.

En finitiva, istas son as consideracions que dende Purna, a organización d'a choventut independentista y revolucionaria aragonesa, queremos fer con a enchaquia d'ista trobada d'o citau «nacionalismo de cuchas». Ya que no hemos asistiú físicament entendemos que no se tensen en cuenta as nuestras propuestas pero no podemos dixer pasar a oportunidad d'instar a totz a participar d'a opción politica y a estratechia que entendemos más coherent.

Zaragoza, a 3 de febrero de 2012

Purna, A Chovenalla Revolucionaria y Independentista